

太平寰宇記

第
四
冊

上

十

十

十

十

十

十

十

太平寰宇記卷之十二

河南道十二

宋州

亳州

宋州

宋州

睢陽郡理
宋城縣

禹貢豫州之域卽高辛氏之子闕伯

所居商邱今州理是也周爲青州之域武王封微

子于宋後爲齊楚魏所滅三分其地魏得其梁陳

留齊得其濟陰東平楚得沛按梁卽今州地秦併

天下改爲碭郡後改爲梁國漢文帝封子武爲梁

王自漢至晉爲梁國屬豫州宋改爲梁郡隋于睢

陽置宋州大業三年又改為梁郡隋亂陷賊唐武
德四年平王世充置宋州領宋城寧陵柘城穀熟
下邑碭山虞城七縣其年以虞城屬東虞州五年
廢東虞州又以虞城來屬貞觀元年廢杞州以襄
邑縣來屬仍省柘城縣十七年以廢戴州之單父
楚邱來屬永淳元年又置柘城天寶元年改為睢
陽郡乾元元年復為宋州自祿山亂兩河郡縣多
所陷沒惟張巡許遠姚閻三人堅守睢陽賊將尹
子奇併力攻圍踰年不下城中孤危糧絕人相食
殆盡時賀蘭進明許叔冀屯軍臨淮爭權不協不

發援師城竟為賊陷巡遠等抗詞不屈遂俱被害
然使賊鋒挫衄不至江淮巡遠之力也開平初升
為防禦州三年升為宣武軍後唐同光元年改為
歸德軍至皇朝因之

元領縣十

今七

宋城 楚邱 柘城 穀熟 下邑 虞城 寧陵

三縣割出

襄邑

入開封府

碭山

入單州

單父

入單州

州境

東西二百二十五里 南北二百六十五里

四至八到

西至東京三百里有通濟渠水陸並通

西至西京七百二十里

西至長安一千五百八十里

東至徐州西界二百一十里

南至亳州西界一百三十二里

西至東京襄邑縣九十五里

北至單州一百八十里

東南至亳州譙縣界一百八十里

西南至陳州二百八十里

西北至曹州二百八十里

東北至兗州四百一十七里

戶

唐開元戶一十萬三千

皇朝戶主二萬一千二百五十客二萬四千二百

風俗

漢書云猶有先王遺風重厚多君子好稼穡惡衣食以致蓄藏太康地記云豫州之分其人得中和之氣性安舒其俗阜其人和今俗多寬慢

姓氏

梁國郡三姓 宋 張 喬

人物

宋襄公

即位以公子目夷為左師以聽政

莊周

宋蒙人，不以為禍，福累心為

漆圍吏楚威王以千金幣迎周，不應釣于濮水

原子思

宋人，蓬戶甕牖，上漏下濕，三日

一舉火十年不製衣，捉衿肘見，納履踵決，子貢相衛，肥馬輕裘，見子思曰：先生何病也？子思曰：無財

者謂之貧，學道而不能行，謂之病，若憲貧也，非病也。韓安國，梁成安人，坐法被獄，吏辱

之 橋玄 睢陽人

唐相魏元忠

宋城人

土產

漆 臬 裕 紵 綿 絀 穀 絹

宋城縣

元七鄉

本宋國蒙縣以宋公及諸侯盟于蒙門

而爲縣名漢爲睢陽在睢水之陽以爲名地屬梁

國隋開皇十八年改爲宋城縣唐因之州城古闕

伯之墟契孫相土亦都于此春秋爲宋國都漢梁

孝王廣睢陽城七十里開汴河後汴水經州城南

睢水在縣南五里水經注云睢渙二水出菑蕩

渠春秋僖公十九年宋襄公用鄆子于次睢杜預

注云睢水受汴東經陳留梁譙沛彭城入泗睢水

又東經睢陽故城南積而爲蓬洪澤 汴河在縣

北四十五里自寧陵縣界流入東出虞城界 隕

石水在縣北一名漆溝左氏謂隕石于宋五古老
云此水有時竭涸五石存焉有潭卽元墜處 蒙
澤在縣北三十五里左氏傳宋萬殺閔公于蒙澤
杜注云蒙澤宋地蒙縣也 小蒙古城在縣南十
五里六國時楚有蒙縣俗爲小蒙城卽莊周之本
邑今復有大蒙城在縣北四十一里後魏地形志
北梁郡有北蒙縣 三王陵在縣西北四十五里
晉北征記云魏惠王徙都于此號梁王爲蒼間赤
任敬所殺三人同葬故謂之三王陵 修竹園在
縣東南十里西京記梁孝王好宮室園苑之樂作

曜華宮築兔園園中有白靈山落猿巖栖龍岫又

有鴈鷺池池中有鶴同鶴洲鳧渚水經云睢水東南

過竹圃又鴈鷺池承龍睢溝水清泠池在縣東

北二里梁孝王故宮有釣臺謂之清泠臺今號清

泠池張巡許遠南霽雲等廟在州南七里唐代

宗大厯二年勅曰頃者國步艱難妖星未落中原

板蕩四海橫波公等內總羸師外臨勅敵析骸易

子曾未病諸兵盡矢窮乃其憂也於戲天未悔禍

人何以堪徒甘殺身不附兇黨信光揚于史策可

龜鑑于人倫其立廟焉以時祭祀箕子冢在縣

北四十一里二十步古蒙城內史記箕子紂之諸
父晉伏滔北征記云望亳蒙間成湯伊尹箕子之
冢墓皆爲邱墟今蒙與北亳相去三十里 宋微
子墓在縣西南十二里史記微子紂之庶兄周書
微子之命王若曰猷殷王元子崇德象賢建爾于
上公尹茲東夏 橋玄墓在縣北十里後漢書云
橋玄宋國睢陽人魏志曹操少不理行季世之人
不奇也惟梁國橋玄異焉墓前碑云漢故太尉橋
公之碑云玄字公祖至皇朝乾德三年勅改爲漢
太尉橋公廟也 廬門春秋傳桓公十四年宋人

以諸侯伐鄭報宋之戰以大宮之椽歸爲盧門之椽杜注云盧門宋國城門也

楚邱縣

北七十里舊八鄉今六鄉

古之戎州卽已氏之邑城也九

州記云已氏本戎君之姓蓋昆吾之後別居戎狄中周襄入居中國故此有已氏之邑焉漢爲已氏縣屬梁國魏於已氏縣置北譙郡後齊郡縣廢隋復爲已氏縣又置戴州縣隸焉大業初廢戴州縣屬睢陽郡唐平竇建德復置戴州以縣爲楚邱貞觀十七年廢戴州縣因隸宋焉 景山在縣北三十八里高四丈毛詩云望楚與堂景山與京 空

岡在縣北三十里高一丈蓋毛詩云景山與京也
堂水在縣北四十五里從單州成武縣入界南
行五里合泡溝毛詩云望楚與堂也 安陽城在
縣北三十八里城豕記云漢高祖與項羽相守築
此城 古楚邱城在縣北三十里毛詩云定之方
中作于楚宮揆之以日作于楚室左傳隱公七年
戎伐凡伯于楚邱杜注云楚邱衛地在濟陰成武
縣西南也 伊尹墳在縣西北十四里按書云沃
丁既葬伊尹于亳都城豕記云濟陰界梁國有二
亳南亳穀熟城北亳在蒙城西北屬睢陽郡今驗

墳西十里有亳城在東京考城縣界晉伏滔北征

記云望亳蒙間成湯伊尹箕子之冢今為邱墟也

柘城縣西南八十里舊十鄉今七鄉即古宋襄氏邑春秋時陳之

株野之地毛詩陳風云株林刺靈公也史記謂陳

涉之攻柘譙皆下之即此地也漢為柘縣以邑有

柘溝以此名縣漢獻帝封曹操為武平侯兼食柘

長平陽夏三縣晉縣廢隋開皇十六年復置加城

字唐貞觀元年廢入穀熟寧陵二縣後以縣人積

年陳訴徭輸路遠永清元年十月又置隸宋焉

泓水在縣西北三十五里春秋僖公二十二年宋

人及楚人戰于泓 大棘城在縣西北三十里左

傳宣公二年宋華元及鄭公子歸生戰于大棘杜

注云在陳留襄邑縣南也 鄆城在縣北二十九

里漢縣名屬陳留王莽曰順通鄭伯克段之地

始基城在縣東南十里譙內記譙西北百餘里有

始基城晉豫州刺史祖逖督護衛策所築始基于

此因為名焉 仇留城在縣北五十里按譙內記

陳川自始基城敗後遣將仇留伐鄆以逼豫州祖

逖遣衛策進戍谷水北面高邱以禦仇留故號仇

留城 夏姬墓在縣東北二百步

穀熟縣

東南四十里
依舊六鄉

古穀地也殷謂之南亳亦嘗都

之卽春秋之穀邱漢于此置薄縣隸山陽郡又改
爲穀陽縣以穀邱之南有穀水也後漢廢熟城合
爲穀熟縣屬梁國魏文帝廢後魏置穀陽郡隋開
皇十六年復置穀熟縣隸宋州唐武德二年置南
穀州四年廢穀州以穀熟縣還宋州 穀邱在縣
南二百步春秋桓公十二年公會宋公燕人盟於
穀邱杜注云宋地也 穀水在縣西南二百步源
從穀邱下南入瀆蕩渠 烏城在縣西南二十里
太康地理志云梁國有烏縣 亳城在縣西南三

十五里春秋莊公十二年宋公御說奔亳孟子云
湯居亳與葛爲隣今寧陵縣界有葛城相去八十
里 龍亢城在縣西南五十里春秋隱公二年莒
人入向注云譙國龍亢縣東南有向城也 故高
辛城在縣西南四十五里地理志云梁國穀熟縣
西南有高辛城帝系譜帝嚳年十五佐顓頊有功
封爲諸侯邑于高辛卽此城也

下邑縣

東一百二十里
舊九鄉今八鄉

戰國時下邑地或以爲陳之

株邑詩株林刺靈公駕我乘馬說于株野史記陳
涉初狗斲以東攻銍鄩苦柘譙皆下之卽此也秦

漢爲下邑縣王莽改爲下治其後因之至唐復改爲下邑今礪山縣卽古下邑城也後魏明帝孝昌二年置礪郡于下邑城移下邑縣于此卽古之栗城也南蓼堤路在縣南五里從穀熟界入八十里東入永城界耆老傳云梁孝王以大梁卑濕徙都睢陽故築此蓼堤舊圖經云西自汴州杞縣入至宋州城東分爲三道中蓼堤北蓼堤是也牛戍驛在縣西北五十里隋大業元年廢本梁孝王牧牛戍也故譙城在縣城北三十一里祖逖屯淮陽進據太邱城遂克譙城而居之謂此也

虞城縣

東北五十里舊八鄉今七鄉

古虞國也舜禪禹封長子商

均子有虞左氏傳謂少康奔有虞後卽爲少康之

邑焉漢爲虞縣莽改爲陳定亭後漢獻帝于此置

蕭縣隸沛國晉復爲虞城縣北齊廢隋又置唐武

德四年以隋末賊亂建爲虞州五年州廢依舊爲

縣還宋景福二年以礪山縣爲輝州虞城隸焉輝

州廢今隸宋故綸城在縣西三十五里左氏謂

少康逃于有虞虞君妻以二姚而邑諸綸有田一

成有畝一旅是也黎邱在縣北二十里高二丈

梁地黎邱有奇鬼善教人黎邱之叟市醉夜歸鬼

乃肖其子而扶之困苦之醒後誚其子對曰非也
明日復飲于市醉而將歸其子復恐爲所苦乃親
迎之叟誤殺之 熟城在縣西四十里闕駟十三
州志云熟城漢之縣名 平臺在縣西南五十里
春秋襄公十七年宋皇國父爲宋平公築臺妨于
農收子罕諫請侯農隙公不許史記云梁孝王大
治宮室築東苑方三百餘里爲複道自宮連屬于
平臺 靈臺在縣西南四十里左傳哀公二十五
年衛侯輒奔宋爲靈臺與大夫飲酒焉 崆峒亭
在縣南五里春秋哀公二十六年宋景公遊于空

澤卒于連中杜注云梁國虞縣東南有地名崆峒
孟諸臺在縣西北十里爾雅云宋有孟諸郭璞
云藪澤名春秋僖公二十八年楚子玉自爲瓊弁
玉纓未之服也夢河神曰畀余余賜汝孟諸之麋
杜注云水草之交曰麋今俗呼爲涓臺蓋陂中有
臺也

寧陵縣

西五十里舊九鄉今五鄉

本甯城古葛伯國于此帝王紀

云湯居亳葛伯爲隣也六國時屬魏安釐王封其
弟無忌爲信陵君而邑于甯魏咎嘗封爲甯陵君
亦此邑之地高帝改爲寧陵封呂臣和帝以寧陵

屬梁今縣北十五里有葛城乃古葛伯所都城也
晉隸譙又隸陳留北齊以還宋 沙隨城在縣西

北七十里左傳成公十六年公會晉齊衛宋邾人
于沙隨杜注云宋地梁國寧陵縣北有沙隨亭

洧陵城在縣東南二十五里左傳成公十六年鄭
子罕伐宋宋將鉏樂懼敗諸洧陂退舍于夫渠不
傲鄭人覆之敗諸洧陵杜注洧陂夫渠洧陵皆宋
地 巳吾城在縣西南三十里陳留風俗傳漢和
帝永元二年分巳氏縣之種于鄉置巳吾縣屬陳
留郡魏書曹公初起兵于巳吾後魏地形志云巳

吾縣屬馬頭 東期城在縣南三十里 西期城

在縣南二十五里賈子曰梁楚邊亭皆種瓜梁數

灌而美楚稀灌而惡楚乃夜滅梁瓜梁邊令乃竊

灌楚瓜瓜亦美楚人怪而問之及見自謝以重幣

而交于梁國故曰期城今俗猶呼為瓜城也 甘

露嶺在縣北五里隋開皇十三年駕幸于岱至此

甘露降因以名焉 故葛城在縣北十五里古葛

伯國以不祀為湯所滅 大棘故城在縣南七十

里左傳宋華元鄭公子歸生戰于大棘又七國反

先擊梁棘壁即此城也 故柘城在縣南七十里

陳之株邑 故鄆城在縣南五十三里漢之鄆縣
鄭伯克段于此也 始基故城在縣南九十里晉
豫州刺史祖逖督護衛策所築初乞活魁遣陳川
據陳留浚儀川遣將魏碩于谷水南營逖遣策等
追戰大破之因卽立城留守策曰吾從祖公北伐
數年功始基于此因以爲名 仇留城在縣南六
十五里初陳川自始基敗後遣將仇留伐鄆以逼
豫州祖逖遣策進戍谷北高邱以禦仇留故呼爲
仇留城

亳州

亳州

譙郡今譙縣

禹貢豫州之域至周不改春秋時爲陳

國之焦邑六國時屬楚在秦爲碭郡地漢爲譙縣屬沛郡後漢熹平五年黃龍見譙太史令單颺以爲其國當有王者興不及五十年亦當復見後如其言及文帝卽位黃初元年以先人舊都又立爲譙國與長安許昌鄴洛陽號爲五都後魏置南兗州周武帝改爲亳州隋亂陷賊唐武德四年平王世充復爲亳州領譙城父谷陽鹿邑鄆五縣五年置總管府管譙亳宋北荆潁沈六州七年改爲都督府貞觀元年罷都督府亳州不改十七年廢譙

州以臨渙永城山桑三縣來屬天寶元年改爲譙郡乾元元年復爲亳州開平二年升爲防禦州後唐爲團練州晉復爲防禦州

元領縣八

今七

譙縣 城父 蒙城 鄴縣 鹿邑 永城 眞源

一縣割出

臨渙

州入宿

州境

東西二百六十七里 南北二百里

太平寰宇記 卷之十一
四至八到

西至東京四百八十六里

西至西京八百九十里

西至長安一千七百四十里

東至徐州五百里

正南微東至潁州徑路二百六十里

西至陳州二百里

西南至陳州三百九十二里

西北至泗州三百四十里

東北至徐州同上

戶

唐開元戶七萬七百三十二

皇朝戶主三萬八百一十三客二萬六千二百九

十七

風俗

與宋州同

人物

老子

苦縣厲鄉曲仁里人

許褚

譙人長八尺餘腰大十圍一手逆曳牛尾太祖封萬

歲亭侯

曹義

沛國譙人爽弟父兄貴盛而獨謙擣著書三篇以諷爽

嵇康

譙國人

夏侯湛

譙國岳齊名與

桓溫

譙國人

戴逵

譙國人總角時以雞卵溲白屑作鄭玄碑武陵王晞聞其能琴使人召之逵對使者破琴曰戴安道

不能為王
門伶人
唐朱敬則
亳州永城人相則天家代以孝義聞門標六闕

奚陟
亳州人不肯受翰林院學士

土產

絲 綿 綾 絹
貢

譙縣
舊二十二鄉今十鄉
漢縣屬沛郡莽曰延成亭後魏無譙

縣有小黃縣置陳留郡隋開皇十年廢郡縣屬亳

大業二年改小黃為譙縣
渦水在縣西三十八

里從真源縣東來魏文帝集建安十九年上至譙

予兄弟從上遊觀經東園遵渦水相伴于高樹之

下乃駐馬書鞭為臨渦賦
譙郡城古之焦國城

也後改爲譙魏武帝之鄉里魏志漢熹平五年黃龍見譙太史令單颺曰其國後當有王者興不及五十年當復見內黃門殷登默記之至延康元年三月黃龍見譙登聞之曰單颺之言其驗茲乎魏書文帝生于譙上有青雲如車蓋終日魏文帝

祠在縣東五里初魏武以議郎告病歸鄉里築室于此讀書秋冬弋獵以自娛文帝于漢中平四年生于此宅故梅城在縣南四十里古梅伯國也

麥邱城桓譚新論齊桓公行見麥邱人問其年幾何對曰八十三矣公曰以子壽祝寡人乎荅曰

使主君甚壽金玉是賤以人爲寶卽此邑人也

太清宮玄元舊宅今有檜樹鹿跡存焉 夏侯湛

墓在縣東北四里晉爲散騎常侍 獨母冢在縣

西三里故老傳云有惇獨之母薛氏無子生自爲

墳卒安葬焉昔楚平王築譙城而薛母賑城夫後

各益其土而大其墳 大饗碑在魏文廟前昔文

帝延康元年幸譙父老立碑于故宅題曰大饗之

碑鍾繇篆額曹子建文梁鵠書時人稱爲三絕

岳牧上考詞石表唐開元二十六年趙冬曦所建

其歲降十道採訪使精擇天下岳牧政之尤者二

十二人客有自京來者損聖札凡十九字詞曰文學資身溫良植操勤于政理恩被黎元考中上蓋錫冬曦詞也乃勒之表端昭示來葉同勅二十一人皆鑄其次

城父縣

東西九十里八鄉

春秋時陳國之夷邑亦曰城父左

傳楚伐陳取焦夷陳邑也昭公九年左傳楚公子棄疾遷許于夷實城父也杜注此時改城父爲夷漢爲縣屬沛郡隋末隸亳唐末避梁王諱改爲焦夷後唐同光元年復舊名肥水在縣西水經注肥水源出山桑縣西北澤藪東南流左右翼佩數

源異出同歸蓋涓脈所注耳有鮑溪水亦此 乾
谿水在縣南五里新序云楚王起章華之臺爲乾
谿之役又左氏謂楚靈王敗于乾谿卽此地也

扶陽故城在縣東北三十六里漢爲縣屬沛郡宣
帝封韋賢于此謚曰節侯又曰恩澤侯表在蕭案
邑名扶陽地理志云扶陽縣屬沛郡 父水在縣
東四里受漳水南流經縣入蒙按水經云汝水支
分東注 藥城在縣南七十二里梁陳之際以爲
縣唐武德三年藥城縣隸文州四年州廢改爲文
城縣屬亳州 伍奢冢在縣西南一里春秋昭公

十九年楚平王處太子建於城父伍奢傅之後無罪而死招魂以葬今有廟存 高陂在縣南五十里周迴四十三里多魚蚌菱芰之利

蒙城縣

東南一百四十里舊六鄉

本漢山桑縣也屬沛郡後漢改

屬汝南郡魏屬譙郡後魏孝文帝于此置渦州理

山桑縣其地後入于梁梁于此置西徐州後復入

魏改爲譙州改譙縣爲渦陽縣隋初改渦陽爲淝

水縣唐武德四年重立山桑縣屬譙州貞觀十七

年廢譙州割屬亳州天寶元年改爲蒙城縣城北

臨渦水後魏渦州城也 垂惠聚漢爲聚邑廢城

在今縣西北二十八里 北狼山南狼山在縣北
二十八里山相對故曰南北 山桑縣城在縣北
三十七里輿地志云山桑漢舊縣屬沛光武封王
常爲山桑侯今城內有亭基陵阜高峻十三州記
云山生于邑其亭有桑因爲縣名宋將檀道濟爲
征西將軍居此因號曰檀公城 南蒙城北蒙城
並在縣北八十里相去四十步皆自後魏孝文太
和七年爲之至東魏武定六年置郡齊天保七年
廢郡爲蒙城唐武德五年又置爲郡開元中廢

鄧縣

東北七十里舊

漢縣屬沛郡古今地名卽鄧亭

是也輿地志云魏以鄴縣屬譙郡漢封蕭何爲鄴侯茂陵書何封國在南陽姚察曰兩縣同作鄴字南陽鄴音贊此沛鄴音嗟班固泗水亭高祖碑云文昌四友漢有蕭何序功第一受封于鄴以韻而言則非南陽鄴也唐開元二十六年移于大梁南垣陽驛以置之 譙東魏畧云太祖于譙東十五里澤中築起精舍讀書射獵閉絕賓客卽謂之譙東 建平故城漢爲縣廢城在今縣西北俗名馬頭城是也 太邱城在縣東北七十里地理志云敬邱後漢明帝更名太邱陳寔爲長是此城也

龍亢城在縣西南十五里春秋杜注譙國有龍亢
縣此城是也 棘城在縣東北十八里春秋昭公
四年冬吳伐楚入棘櫟麻杜注云譙國鄆縣東北
有棘亭卽此是也

鹿邑縣

西一百一十七里舊漢
二十二鄉今七鄉

漢蕲縣之地屬沛郡後漢

于今縣東北十五里置武平縣隋開皇三年廢郡
縣屬亳州十八年改爲鹿邑縣取故鹿邑城爲名
城在縣西十三里春秋時鳴鹿地也 濯水一名
曲水源從陳州宛邱縣東北固一作涸河出至縣界
入真源縣按溝洫志漢武帝元光五年河水泛溢

上使汲黯疏決數十道灌水卽陳郡內舊引水瀆也
鳴鹿臺在縣城內春秋成公十六年晉知武
子佐下軍以諸侯之師侵陳至于鳴鹿卽此是也
武平故城在縣東北十八里建安元年獻帝以
操爲大將軍封武平侯以此城爲封邑

永城縣

東北一百四十五里十一鄉

春秋芒縣之地後漢臨睢縣

之境晉爲蘄縣之地隋大業六年于馬甫城東北
三里置永城縣屬譙郡唐武德五年移縣于馬甫
城貞觀十七年罷譙州以縣屬亳州 碭山在縣
北五十里北去芒山八里地理志云碭山出文石

漢高祖隱芒碭山澤間應劭曰芒今在臨睢卽永
城縣是也碭屬梁國今碭山縣是二縣之界有山
澤之固可以隱也 芒縣故城漢縣廢城在今縣
北 太邱故城漢縣廢城在今縣西北陳仲弓爲
太邱長卽此城也 永城故城在縣東北三里隋
大業六年置永城縣於此十二年爲賊房憲伯所
破因廢後移于馬甫城置卽今縣 碭山故城在
縣北五十三里水經云碭陂水東經碭山縣故城
北卽此城是也 費城在縣西南二十五里南臨
渙水按郡國志云曹騰封鄴費亭侯卽此城是也

魏書騰卽操祖也 梁孝王墓在縣北五十里高
四丈周迴一里碭山南嶺上按郭緣生述征記云
梁孝王葬于碭山鑿山作島穿石爲藏行一里到
藏內曹操別傳云引兵入碭伐梁孝王冢破棺收
金寶萬斤

真源縣

西南五十九里舊十八鄉今八鄉

卽楚之苦縣地史記謂老

子苦縣人也漢爲縣屬淮陽國晉咸康三年更名
谷陽蓋谷水之陽因以爲名隋初改爲仙源以老
子所生之地爲名唐麟德三年高宗幸瀨鄉改谷
陽爲真源縣以隸亳焉 老子祠崔元山瀨鄉記

老子祠平時教化學堂故基也漢桓帝命邊韶爲
文云老子伏羲時爲鬱華子祝融時爲廣成子黃
帝時爲大成子顓頊時爲赤精子帝嚳時爲錄迴
子堯時爲務成子皆有像 李母祠瀨鄉記李母
祠在老子祠北三里祠門內右有聖母碑東院內
有九井述征記廟內九井或云汲一井而八井動
輿地志老子祠卽老子所生舊宅老子者道君也
三皇之始乘白鹿下託于李母練體易形復命胞
中七十二年生于楚國李母星名也在斗魁中老
子星精也爲人黃色美目面有壽徵黃額廣耳大

目疏齒方口厚脣額有參子達理日角月角鼻有
雙柱耳有三漏足踏三五手把十文十二聖師各
有三法凡三十六法唐乾封元年册李母爲先天
太后因改祠爲洞霄宮 太清宮玄元舊宅今有
檜樹鹿跡存焉宮前有闕各高一丈七尺魏黃初
三年文帝所立其闕有銘是鍾繇書皆破闕唯四
字存焉 李母墳在縣東十三里水經注云老子
宮前有李母墳東有碑漢桓帝永興元年譙縣令
長沙王阜所建 枯柏裴松之述征記云老子宮
前有松柏雙株左階之柏久枯隋大業十三年忽

從根生一枝聳幹一丈三尺枝葉青翠唐武德二
年更生一叢直上五尺橫枝兩層枝葉相覆異于
常樹 瀨水在縣東南十二里于苦縣界相縣故
城西南五里谷水分流入靈奚池東入渦水相縣
在瀨水東是也 靈奚池在玄元宮北 寧平城
在縣西北五十五里按漢書地理志寧平縣屬淮
陽晉東海王越自陽城率甲士四萬東屯于項永
嘉五年薨秘不發喪石勒兵追之及寧平城焚越
屍于此數萬眾歛手受害尸積如山王夷甫亦遇
害

校勘

宋州

宋城縣

總序

本宋國蒙縣以宋公及諸侯盟于蒙門而為縣名

既云本蒙縣下又云漢為睢陽疑舛誤按漢書地理志梁國有睢陽蒙二縣睢陽微子所封而蒙則杜預注左氏莊公十二年注所云蒙澤宋地梁國有蒙縣者也縣自取名蒙澤而蒙門特宋城門之名當在故

睢陽不可以名他縣但蒙縣後併入睢陽

耳

甯陵縣 總序

帝王紀云湯居亳

按帝王紀即帝王世紀後倣此

亳州

譙縣

渦水魏文帝集建安十九年上至譙

按三國志建安七年春正月公軍譙又十

四年春三月軍至譙秋七月自渦入淮今

于譙縣作建安十九年于宿州蘄縣作十八年檢文帝集又云八年皆與史不合未詳孰是

真源縣

總序

隋初改爲仙源

按隋書地理志譙郡谷陽縣後齊省開皇六年復初無改仙源事新舊唐書地理志皆云谷陽乾封元年改爲真源載初元年改爲仙源神龍元年復曰真源與元和郡縣志所序畧同唐祖老聃故以名縣今記

恐誤

太平寰宇記卷之十二終

太平寰宇記卷之十三

河南道十三

鄆州

曹州

廣濟軍

鄆州

鄆州

東平郡今理須城縣

禹貢兗州之域星分奎婁春秋屬宋

卽魯附庸須句

音劬

國太皞之後風姓左傳云公伐

邾取須句戰國時屬魏秦兼天下屬碭郡又爲薛

郡地漢爲東平國又地理志云東平故梁國景帝

中六年別爲濟東國武帝元鼎元年爲大河郡宣

帝甘露二年爲東平國晉宋及後魏爲東平郡周

太平寰宇記 卷之十三
大象二年於此置魯州尋廢隋開皇十六年分兗
州萬安縣置鄆州大業三年罷州爲東平郡理古
須句城唐武德五年平徐圓朗于鄆城置鄆州領
鄆城須昌宥城鉅野乘邱五縣又以廢壽州之壽
張來屬其年置總管府管鄆濮兗戴曹五州七年
改爲都督府貞觀元年罷都督府仍以鉅野屬戴
州又廢宥城乘邱二縣八年鄆以城下濕移治須
昌景龍元年又置宥城天寶元年改爲東平郡乾
元元年復爲鄆州貞元三年升爲都督府迨至皇
朝爲天平軍節度

東北元領縣十 今七

須城 壽張 中都 平陰 東阿 盧縣 陽

穀

二縣割出

鉅野 州入濟 鄆城 州入濟

一縣廢

東平 併入須城

州境

東西一百五十九里 南北二百三十五里

四至八到

水經注 卷之十三
二
西南至東京六百里

西南至西京一千里

西南至長安一千八百里

東至兗州二百里

西至濮州一百八十八里

南至曹州三百三十里

北至博州一百七十里

東南至兗州一百三十五里

西南至濮州一百四十五里

東北至濟州二百五十里

西北至渡河取朝城縣路至魏州二百三十里

戶

唐開元戶三萬三千三百八十七

皇朝戶主一萬五千一百八客二萬七千七百二十四

風俗

地連鄒魯境分青齊碩學通儒無絕今古家尚質
直人多魁岸不規商賈肆力農桑亦風土之使然
也

姓氏

東平郡四姓 萬 呂 畢 康

人物

劉楨

字公幹 東平人

張公藝

壽張人 九世不分居

馬隆

平陸人 為武威

太守以磁石夾道賊負鐵不得過以為神也

王彥章

壽張人

土產

阿膠

蚰牀子

綿

官蚰

須城縣

舊四鄉今八鄉

漢舊縣屬東郡古須句國按前須昌

縣在今縣東南三十里須昌故城是也隋改須昌

為宿城縣更立須昌縣于今理屬鄆州後唐改為

須城縣避國諱也 梁山在縣界 州理故須句

城左傳任宿須句顓臾皆風姓注須句雖列國而
削弱不能自通爲魯私屬如顓臾之比 無鹽故
城在縣東三十六里漢舊縣云古宿國也列女傳
無鹽有醜女名宿瘤齊宣王善之立爲夫人卽此
縣女也 清水石橋在縣西三里隋仁壽元年造
石作華巧與趙州石橋相埒長四百五十尺 郟
鄉亭左傳季子鬪雞之所杜注郟魯地東平無鹽
縣東南有郟鄉亭 桓公溝晉永和中將軍毛穆
之所鑿義熙十三年王師濟河朱超石重開鑿水
經注云桓溫率眾北入掘通濟渠今謂之桓公溝

是也 劉公橋在縣東二十七里宋武北伐至此

造故號之 柳舒故城左傳晉伐鄭齊陳成子救

之及留舒去穀七里穀人不知 東平憲王陵光

武子蒼也章帝幸東平感念蒼謂其諸子曰思其

人至其鄉其處存其人亡 伏生城伏生所居傳

尚書于太常掌故晁錯因號之 呂母垞音茶後漢

東海呂母合眾于此 東阿故城漢東平國故城

在今縣東魏志程昱謂范令靳允曰曹使君智殆

天授君必固范我守東阿田單之功可立謂此也

阿井東阿有大井巨若輪深七八丈每歲取此

水糞膠入貢本草重之 烽倉故城宋武立烽候
于此今有小城尙存 景子殿東平憲王所起有
二殿東西相向 東平思王墓漢東平思王宣帝
之子在國思還京師後葬其冢松柏皆西靡 羊
牧黃初平叱石成羊之所今石猶存 廢東平縣
漢縣故城在今鄆州東南三十二里隋于故城置
宿城縣仍置須昌縣于今所唐貞觀八年州自鄆
城移于須昌縣後廢宿城縣景雲二年以郡邑頗
大人物繁極復分須昌置宿城縣貞元四年改宿
城爲東平縣移就郭下太和四年改爲天平縣六

年七月廢天平縣入須昌縣

壽張縣

西南四十五里依舊四鄉

漢爲壽良縣屬東郡故城在今

縣界應劭曰光武叔父名良故改爲壽張縣屬東

平國隋開皇三年罷郡縣屬濟州十六年割屬鄆

州唐武德四年屬壽州五年廢壽州屬鄆州壽

州故城在縣東南十五里隋末百姓築爲堡唐武

德四年于此置壽州梁山在縣南三十五里漢

書梁季王北獵梁山有獻牛足上出背上季王惡

之尋病而薨穀城山在邑界焦氏山山北有

漢司隸校尉魯峻冢前有石祠堂中四壁皆青石

平隱起自書契以來忠臣孝子貞婦孔子及弟子形
像徧皆刻石記之有磬石數枚後爲宰牧所取魯
氏置訴後坐免官 范城左氏傳云范宣子對魯
大夫穆叔曰昔勾之祖在周爲唐杜氏晉主夏盟
爲范氏今城卽勾食邑于范漢爲縣左氏注云范
縣西北有秦亭卽庾子山云人有秦亭之哭是也
中都縣東六十五里
依舊四鄉古中都之地漢爲東平陸縣屬
東平國亦古之厥國地今邑界有厥亭存又按史
記魯敗齊于平陸卽此地後漢併爲須昌縣地據
邑界有殷密古城卽古之中都國城也自漢至隋

或爲平陸縣屬兗州唐天寶元年三月改爲中都
縣所隸不改貞元十四年割入鄆州後自鄆復隸
兗州尋又復歸鄆焉 古闕城皇覽冢墓記云鄆
州壽張縣闕城中有蚩尤冢支體異葬也故此亦
有冢焉常以十月有氣如匹絳自上屬下號曰蚩
尤旗今屬濟寧鉅野 汶水北去縣二十四里
桓水在縣西八十里晉桓溫進軍北次金鄉令鑿
鉅野三百里通舟運自清水入河以溫所鑿故曰
桓水俗呼爲桓河

平陰縣

東九十里舊十鄉今三鄉

本漢肥城縣屬泰山郡古肥

子國隋開皇十四年于今縣西北二十八里置榆
山縣大業二年移于今理改名平陰屬濟州取界
內平陰故城以爲名天寶十三載州廢縣割隸鄆
州太和六年七月廢以地併入東阿盧二縣至開
成二年七月王源中奏境內闊遠東西百二十里
南北近二百里無縣邑以理居人制禦寇盜請復
平陰縣從之 黃河去縣十里 陶山在縣東三
十五里史記云范蠡浮海出齊變姓名自號鴟夷
子皮閒行止于陶因號陶朱公焉 巫山一名孝
堂山左傳云齊侯登巫山以望晉師卽此山山上

有石室俗傳云郭巨葬母之所因名孝堂山 平

陰城在縣東北三十五里左傳襄公十八年晉侯

沈玉濟河會于魯濟尋湏音梁之盟同伐齊齊侯

禦諸平陰今有故城在今縣東南 長城故長城

首起縣北竹書紀年云梁惠王二十年齊築防以

為長城又太山記曰太山西北有長城緣河經太

山千餘里至琅邪臺入海往往有壁門邸閣四五

處猶在史記蘇代說燕王燕王曰齊有長城鉅防

足以為固是也 鞍城左氏謂齊戰于鞍城在縣

東 故肥城漢縣後漢省廢城在今縣東南 左

邱明墓在縣東南五十五里

東阿縣

西北四十五里舊十五鄉今四鄉

春秋時爲齊之阿地也漢

爲東阿縣今爲祝阿縣焉魏武帝始封于此晉屬

濟北國隋開皇中屬濟州唐天寶十三年濟州廢

縣屬鄆州郡國志其地出繒縑故秦王服阿縞卽

此地也 魚山一名吾山漢書溝洫志武帝臨河

決作瓠子歌曰吾山平兮巨野溢魚怫鬱兮迫冬

日吾山卽魚山述征記濟北郡史延超魏嘉平中

有神女成公智瓊降之超同室疑其有姦以告監

國詰問超具言之智瓊乃絕後五年超使將至洛

西到濟北魚山下隕上遙望曲道頭有車馬似智
瓊前到果是同乘至洛克復舊好太康中仍存魏
陳思王曹植嘗登此山有終焉之志遂葬其西亦
其所封國也周迴三十里 穀城山一名黃石漢
書黃石公出一編書授張良曰讀是則爲王者師
後十三年見我濟北穀城山下黃石卽我也 浮
山故老相傳云堯時大水此山浮于水上時有人
纜船于巖石間今猶有斷鐵鎖存焉 故穀城在
今縣東漢于此立縣後廢故城存焉按郡國志云
穀城管仲私邑其城內有夫子五冢存焉 管仲

井西征記云穀城南山有管仲井焉 周首亭郡
國志云周首亭卽埋長狄榮如首于此卽此地也
水經注謂之盧子亭 東阿故城在縣西二十里
漢東阿縣城晉太康後省魏志程昱謂范令靳允
曰曹使君智殆天授君必固范我守東阿卽此也
陽穀亭在縣東南四十二里左傳齊桓公會諸
侯于陽穀卽此也 阿膠井水經注大井在東阿
深七八丈每歲取井水煮膠入貢本草所謂阿膠
也 項羽墓在縣東二十七里初羽封魯公羽死
魯猶爲楚守漢王示以羽首魯方降乃以公禮葬

羽于此 陳思王墓在魚山

盧縣 西北二十里 依舊二鄉 漢舊縣屬太山郡都尉理之濟北

王所都後漢盧縣屬濟北國宋屬濟北郡隋開皇

三年罷郡縣屬濟州大業三年復為濟北郡唐武

德四年討平王世充復為濟州理碻 苦高 碻音城 反 敖

本秦東郡之茬平縣地其城西臨黃河晉末為河

水所毀移理河北博州界事具博州宋元嘉二十

七年寧朔將軍王玄謨前鋒入河平碻礮立戍守

之都督劉義恭以沙城不堪守召玄謨毀城而還

後又城之後魏畧得河南八年於此置濟州至唐

天寶十三年州爲河所陷廢 碣磳津在縣北一
里後魏于此置關名濟州關隋末廢 劉公橋駕
濟水在縣南二十七里宋高祖伐燕過此造橋故
呼爲劉公橋隋末廢貞觀元年重造長十二丈闊
一丈二尺 盧醫史記云扁鵲生盧故云盧醫盧
水經是邑縣因是名也 臨邑故城在縣東卽今
謂之馬防城是也 長城經是邑

陽穀縣 西七十里舊十五鄉今十六鄉 本漢須昌縣地按漢須昌在

鄆今縣界亦有須昌故城隋開皇十六年于此置
陽穀縣屬濟州取縣界故陽穀亭爲名唐天寶十

太平寰宇記卷之十三
三年濟州爲河水陷沒以縣屬鄆州至皇朝開寶
六年又河水衝破縣城至太平興國四年移于上
巡鎮卽今縣理 黃河在縣北十二里 故伏城
在縣東南三里蓋伏生所居故號之

曹州

曹州

濟陰郡今
理濟陰縣

禹貢豫州之域星分氏宿二度禹貢

曰荆河惟豫州導荷

音

澤被孟豬荷澤在州東北

九十里濟陰縣界于周又爲曹國之地後屬宋左
傳哀公八年宋景公滅曹按曹國在州東北三十
七里濟陰縣界故定陶城是也七國時屬齊宋爲

齊楚魏所滅三分其地齊得其濟陰東平漢爲濟
陰郡之地在濟水之南故以爲名景帝中六年別
爲濟陰國宣帝甘露二年更名定陶哀帝更爲濟
陰郡屬兗州按此前濟陰理在今州東北四十七
里定陶故城宋移理城陽按城陽今濮州雷澤縣
理是也後魏于定陶城置西兗州後又徙理在城
卽今州理是也仍移濟陰郡理此郡與州同理周
武帝宣政元年改西兗州爲曹州取曹國爲名也
隋大業三年改爲濟陰郡唐武德四年平孟海公
復爲曹州領濟陰定陶冤句離狐乘氏併置蒙澤

晉陽等七縣其年省晉陽五年以廢梁州之考城
來屬貞觀元年省定陶蒙澤二縣入濟陰十七年
以廢戴州之成武來屬天寶元年改爲濟陰郡乾
元元年復爲曹州晉天福十二年降爲刺史州周
廣順二年復升彰信軍至皇朝因之

元領縣六

今四

濟陰

冤句

乘氏

南華

二縣割出

考城

入開封府

成武

入單州

州境

東西二百五十九里 南北二百五十九里

四至八到

西南至東京二百二十里

西至西京六百五十里

西至長安一千五百二十五里

東至單州一百八十里至廣濟軍三十五里

南至宋州一百八十里

北至濮州一百八十里

東至宋州楚邱縣八十里

西南至開封府考城縣八十里

東北至濟州鉅野縣一百四十里

西北至澶州衛南縣一百八十二里

戶

唐開元戶七萬四千三百

皇朝戶主一萬九千三十六客七千五百九十八

風俗 同宋州

姓氏

濟陰郡五姓 蔡 丁 江 曹 易

人物

冉雍 曹州人

卞壺 曹州人 拜御史中丞

郝詵 濟陰人

唐英

公李勣

離狐人

左僕射劉晏

南華人

土產

絹

貢

葶子

蛇床子

貢

犬

濟陰縣

舊十五鄉今六鄉

本漢定陶縣之地屬濟陰郡自漢

至周皆為定陶縣之地按定陶縣在今縣東北四

十七里定陶故城是也隋開皇六年于此置濟陰

縣屬曹州 曹南山在縣東二十里詩所云薈兮

蔚兮南山朝濟是此也 左岡在縣東北五里岡

阜連屬林木交映以近左城故以名焉 荷水水

經云荷水俗謂之五丈溝亦名南濟水西自考城

縣界來東經陶邱尙書所謂東出于陶邱北又東至于菏 汜水在縣南上承菏水昔漢高祖旣定天下卽帝位于定陶汜水之陽張晏曰汜水在濟陰界取其泛愛弘大而潤下也按今汜水東經縣南亦有高祖卽位壇據叔孫通傳云高祖爲皇帝通于定陶就其儀卽在濟陰是也 菏澤在縣東北九十里定陶城東北禹貢云導菏澤被孟豬注云菏澤在胡陵孟豬在菏東北水流溢覆被之也 州理中城蓋古之陶邱也一名左城帝王世紀舜陶于河濱卽禹貢之陶邱今濟陰定陶之西有

陶邱是也爾雅云再成爲陶邱成猶重也左城亦名之曰葬城蓋恭王之陵寢也漢祖壇在縣東北二十里漢高祖五年卽位于定陶汜水之陽故立壇張晏謂泛愛之汜也濟堤卽濟水之故堤也國都城記曰自復通汴渠已來舊濟遂絕今濟陰定陶城南唯有濟堤及枯河而已皆無水三駸亭古國也在縣東北四十九里尙書云湯伐桀戰于鳴條之野夏師敗績遂伐三駸俘厥寶玉注云三駸國名桀走保之今定陶是也慎子墓在縣西南四里慎子慎到也著書四十四篇穰

侯城在縣西十七里秦宣太后弟也封于穰益封于陶故葬于此董昭墓在縣東二十里昭定陶人爲魏河南尹堯溝九州記云陶卽堯國昔帝堯于此所開溝也因名之龍池九州要記云春秋颺叔氏有裔子董父好龍舜遣養龍于陶邱是爲參龍氏今池存焉貫城卽古貫國也今名蒙澤城禮記明堂位曰崇鼎貫鼎天子之器左氏亦謂齊宋盟于貫是也伯樂冢秦人善相馬者葬此莘仲故城在縣東南三十里蓋古之莘國也夏本紀云昔鯀納有莘氏女生禹帝王紀曰伊尹

耕于莘野湯聞其賢聘以爲相卽此城

冤句縣

西四十七里舊十鄉今八鄉

本漢舊縣也漢初屬梁國景

帝時屬濟陰郡後漢及晉同宋無冤句縣後魏復

置屬郡不改隋開皇三年罷郡以縣屬曹州 賁

棗故城在縣西北四十里史記魏王謂張儀曰賁

棗將叛齊兵又進爲之柰何漢書樊噲攻賁棗屠

之 濟陽故城在縣西南五十里漢濟陽縣地也

五行志宣帝七年濟陽地裂五丈又曰徵昌邑王

賀自定陶至濟陽求長鳴雞筇竹杖卽此處東觀

漢記云光武以建平元年生于濟陽縣光照一室

是歲有嘉禾生一莖九穗大于凡禾因名秀光武

皇考為濟陽令時生光武 袁紹故城在縣北七

十里紹所築故名 大瀾溝一名冤水詩云出宿

于沛飲餞于瀾即此也 園客祠在縣西南五十

三里故老云園客濟陰人也庭種香草有神蛾大

繭之異而立祠 甯武子墓在縣東十五里 漆

園城在縣北五十里莊周為吏之所舊置監今漆

園城北有莊周釣臺

乘氏縣北五十四里舊本漢舊縣也屬濟陰郡至晉

同按此前乘氏縣在今鉅野西南五十七里乘氏

故城是也宋廢後魏太和十二年于今縣置乘氏

縣取漢乘氏縣為名也隋開皇三年罷濟陰郡屬

曹州大業末年廢唐武德四年重置屬曹州大

饗故城在縣西北三里故老云古之鄆音蒙城也後

改名大饗城 重邱故城一名廩邱在縣東北三

十一里左傳襄公十七年衛孫蒯田于曹隧飲馬

于重邱重邱人毀瓶因詢詞之即此也 句陽故

城在縣北三十五里地理志云句陽句瀆之邱也

春秋隱公八年宋公衛侯遇于垂後漢郡國志云

句陽有垂亭 故桂城史記齊威王以田忌為將

孫子為師與魏戰于桂陵大破魏師 葭密城竹

書紀年幽公十三年魯季孫會晉侯于楚取葭密

遂城之漢以為縣 閔損墓在縣城內損字子騫

魯人也

南華縣西北一百二十里原七鄉半本漢離狐縣屬東郡莽曰瑞

狐舊傳初置縣在濮水南常為神狐所穿穴遂移

濮水北故曰離狐後漢屬濟陰郡晉宋不改按此

前離狐在今縣西北三十三里離狐故城是也後

魏時移于今理高齊及周屬郡不改隋開皇三年

罷郡屬曹州唐天寶元年改曰南華 濮水西自

滑州韋城縣界入在縣南五里又東入乘氏縣界
昔殷紂使師延作靡靡之樂武王伐紂師延自投
濮水而死謂此水也

廣濟軍

廣濟軍

理定陶縣

按雜說定陶卽帝堯之所都也宋永初

山川記云堯先居唐後居陶故曰陶唐氏十道志
云堯冢在曹州界又雜說范蠡相越平吳變姓名
爲朱公居于陶號陶朱公卽此漢爲定陶縣屬濟
陰國宣帝甘露二年更名定陶國封皇子躡爲王
以處其地晉爲濟陰郡後魏置沛郡後改爲西兗

州後周改西兗州爲曹州定陶縣屬不改隋大業
十三年大亂爲賊帥孟海公所陷遂廢唐武德四
年割屬戴州其年又隸曹州貞觀元年省唐三百
年只爲鎮戍至周廣順中于定陶建廩庾推鹽鹺
音醴之利至皇朝乾德元年東疏菏水漕轉兵食于
鎮置發運務開寶元年尋改爲轉運司太平興國
二年轉運使何峴奏請升定陶鎮爲廣濟軍至四
年轉運使張去華又奏請分曹單濮濟四州之境
民置定陶縣以隸軍

領縣一

定陶

軍境

東西三十七里

南北四十里

四至八到

西至東京二百七十里

西至西京六百七十里

東至單州成武縣六十五里

西至曹州濟陰縣二十二里

南至濟陰縣界二十四里

北至乘氏縣五十二里

水經注卷之三

東南至成武縣界三十六里

西北至乘氏縣界三十二里

西南至濟陰縣界十一里

東北至濟州鉅野縣一百三十里

戶

皇朝新割戶主五千四十八客八百八

風俗 同曹州

人物

魏相 字弱翁濟陰定陶人為漢丞相

張馴 後漢人字子雋定陶人通春秋與蔡邕共

定六經為丹陽太守徵拜尚書

土產

置軍後無所貢

定陶縣

鄉五

漢縣貞觀元年省今軍城是也太平興國

四年割曹單濟濮四州近軍境人戶置縣復古名

也定陶故城今軍城是也西南一隅廢荆城在

縣東北二十里舊經云按皇覽冢墓記是戰國時

魏將龐涓與孫臏相持處孟海城在縣東北三

十里隋賊帥孟海公陷曹州築此南北二城髣

山廟在縣西北五里層阜之上按髣山古曹國葬

地連屬十五里髣髣似山因名自曹叔振鐸至伯

陽二十五代皆葬于此 漢高祖卽位壇在縣南

十里 曹南山在縣南二十里 獨孤山在縣東

北十九里 戚姬定陶人漢高略地至定陶獲焉

季子村卽孟昌宗定陶人母疾割股以饋母疾

愈本定陶古城此名季子村 漢定陶恭王廢殿

基在縣南一里古城內 三醜亭在縣東北三十

里 彭越臺在縣東一里

太平寰宇記卷之十三終

太平寰宇記卷之十四

河南道十四

濮州

濟州

單州

濮州

濮州

濮陽郡今理鄆城縣

禹貢兗州之域古昆吾舊壤顓頊遺

墟故曰帝邱亦曰高邱春秋時為衛地春秋齊桓

公會諸侯于鄆注云鄆衛地今東郡鄆城也按鄆

城即今理是也戰國時屬齊威王九年趙伐我取

鄆衛獨有濮陽秦滅濮陽併天下置三十六郡今

州即秦之東郡地在漢為濟陰郡之鄆城縣後漢

獻帝于此置兗州晉分置濮陽郡後改爲濮陽國
封皇子允爲王後魏爲濮陽郡後周因之隋開皇
二年以濮陽屬東郡以鄆城屬鄆州十六年于此
置濮州大業二年廢濮州分入東郡東平濟北三
郡唐武德四年平王世充復置濮州領鄆城廩城
雷澤臨濮昆吾濮陽永定安邱長城九縣五年廢
安邱長城二縣八年廢昆吾永定廩城三縣貞觀
八年割濟州之范縣來屬天寶元年改爲濮陽郡
乾元元年復爲濮州

元領縣五

今四

鄆城 臨濮 雷澤 范縣

一縣割出

濮陽 入澶州

州境

東西二百二十五里 南北一百四十五里

四至八到

西南至東京三百一十二里

西南至西京七百九十五里

西南至長安一千六百五十五里

東至鄆州一百八十里

南至曹州二百一十里

西至滑州二百一十五里

北隔黃河二十里渡河至魏州一百六十里

東南至兗州三百六十九里

西北至相州三百三十三里

東至齊州二百四十八里

戶

唐開元戶五萬七千七百八十三

皇朝戶主一萬一千七百二十六客四千二百八

十三

風俗同鄆州

姓氏

濮陽郡七姓 吳 徐 黃 慶 房 袁 扶

人物

蘧伯玉 史鱗 卜商 計然隱海澤與 端木

賜 汲黯皆濮陽人前奏事帝不冠不敢見武帝嘗曰甚矣黯之蕙也古有社稷臣黯近

之 吳質鄆城人 吳隱之濮陽鄆城人為廣州刺史

矣古人云此水一飲懷千金 唐杜暹濮陽人為詩

居 試使夷齊飲終當不易心 唐杜暹濮陽人為詩

土產

王元感濮州人

綿 絹 貢

鄧城縣

舊入鄉

本漢舊縣屬濟陰郡漢獻帝于此置兗

州魏又自此移兗州理東郡之廩邱晉時屬濮陽
國宋無鄧城後魏重置屬濮陽郡隋開皇三年罷
郡縣改屬鄆州十六年於此置濮州以縣屬焉大
業二年廢濮州縣屬東平郡唐武德四年重置濮
州縣又隸焉 黃河西自濮陽縣界流入北去縣
二十里又東流入范縣界 州理城在故鄧城
中魏文帝以臨淄侯植爲鄧城侯晉武帝以皇子
允爲濮陽王皆理于此述征記曰魏武帝征徐州

陳宮說東郡太守張邈迎呂布于時縣悉叛荀彧等保阿鄆范三縣而已堯城在縣東北五里偃朱城在縣西北十五里新臺在縣東北十七里詩衛宣公納伋之妻作新臺于河上而要之北去河四里陳思王臺在縣西二里曹植爲鄆城侯因築臺于此

臨濮縣

南六十里舊五鄉

本漢成陽縣地屬濟陰郡按漢成

陽縣今雷澤縣是也隋開皇十六年分鄆城南界雷澤西界置臨濮縣屬濮州南臨濮水故以名焉大業二年廢濮州縣亦廢其地入雷澤鄆城二縣

唐武德四年重置屬濮州 瓠子河西北自濮陽
界流入北去縣二十一里又東流入雷澤縣界
清邱在縣西三十五里高五丈春秋晉人宋人衛
人曹人同盟于清邱杜注云清邱衛地在今濮陽
東南 垂亭左傳宋公衛侯遇于垂

雷澤縣

東南九十里
依舊五鄉

本漢邲陽縣也古邲伯姬姓之

國史曰周武王封弟季戴于邲今縣北三十里邲
都故城是也漢以爲縣屬濟陰郡晉自南遷之後
濟陰縣移理于此隋開皇十六年于此置雷澤縣
因縣北雷夏澤以爲名屬濮州大業二年省濮州

縣屬鄆州唐武德四年重置濮州縣又屬焉 歷
山在縣西北十六里史記云舜耕歷山耕者讓畔
鄭玄云山在河東應劭以爲卽雷澤中之歷山皇
甫謚以爲在濟陽與雷澤相次三說不同未詳孰
是 澠水沮水二源俱出縣西北平地尙書曰雷
夏旣澤澠沮會同去縣北十四里 雷夏澤在縣
北郭外澠沮二水會同此澤河圖云大跡出雷澤
華胥履之而生伏羲山海經云雷澤有雷神龍首
人頰鼓其腹則雷史記云舜漁雷澤漁者讓澤
邠都故城在縣北三十里卽邠伯初封之國也說

苑曰昔孔子遊于泰山行于郈之野見榮啟期歌
三樂卽此城也 姚城在縣東三十里援神契曰
帝舜生于姚墟應劭曰姚墟與雷澤相近 堯母
廟在縣西南四里述征記云郈陽城東南有堯母
慶都之墓上有祠廟繞墓有池池中有魚頭間有
印謂之印頰魚 中山夫人廟在縣西五十步夫
人卽堯之四妃也 堯陵在縣西三里自堯卽位
至永嘉三年二千七百二十一年記于碑唐貞觀
十一年有詔禁人芻牧春秋奠醑 仲山甫墓在
縣西北一里墓前有祠堂石室儼然若新 南北

濮水水經云濮水又東分爲三瀆昔師延爲紂作
靡靡之樂紂滅延投此水衛靈公將至晉聞而寫
之廩邱左氏傳云齊烏餘以廩邱奔晉是此地
漢置縣今有故城存在縣北重壁臺穆天子傳
云天子遊于河濟盛君獻女天子爲造重壁臺以
處之

范縣

東北六十里舊六鄉今四鄉

本漢舊縣屬東郡春秋時晉大

夫士會之邑後漢同晉屬東平郡宋及後魏同高
齊廢隋開皇六年又置范縣屬濟州至十六年改
屬濮州大業二年廢濮州唐武德二年於此置范

州領范一縣五年廢范州以縣屬濟州貞觀八年
改屬濮州 故顧城在縣東南二十八里夏之顧
國也詩曰韋顧既伐昆吾夏桀注云三國黨于桀
皆爲湯所誅 秦亭左氏傳云魯築臺于秦杜注
云范縣西北有秦亭是也 閔子騫墓在縣東南
二十里孟村高一丈 左伯桃墓在縣東南五十
里新安村高一丈

濟州

濟州

濟陽郡今
理鉅野縣

禹貢兗州之域春秋時其地屬齊亦

齊衛二國之境今郡理卽碣磔城按地理志云碣

礮古津也城名因字之秦爲東郡荏

仕淄切

平縣地

按地理志云荏平屬東郡後亦屬東郡及濟北國

宋元嘉七年到彥之北伐拔此城後又失之至二

十七年以王玄謨爲寧朔將軍前鋒入河北拔之

因以固守于此又置礮礮戍或爲濟北郡後魏太

武八年于此立濟州又爲濟北郡其外城卽後魏

正光中刺史刁宣所築按郡國志云後魏置濟州

于單于城中卽石勒所耕處聞鼓角之聲此其地

也至周建德七年又築第二重城置肥城郡隋初

置濟州煬帝初復爲濟北郡唐武德四年平王世

兗改為濟州或為濟陽郡皆此天寶十三載廢郡以所隸五縣併歸鄆州至大厯中復立濟州唐末又廢入鄆州周高祖廣順二年九月平兗州廻至鉅野因詔于此復置濟州仍割兗州之任城金鄉鄆州之中都等縣隸之其年十二月又割鄆州鄆城縣隸之中都卻入鄆州

今領縣四

鉅野

鄆州割到

鄆城

同

任城

兗州割到

金鄉

同

州境

東西一百五里

南北一百五十五里

四至八到

西至東京四百五十里

西南至西京八百七十里

西南至長安一千七百二十里

東至兗州鄒縣一百三十五里

西至濮州雷澤縣八十五里

南至單州成武縣一百一十里

北至鄆州一百一十五里

東南至徐州豐縣二百二十五里

西南至曹州一百五十里

東北至兖州一百三十五里

西北至濮州一百四十五里

戶

唐開元戶在鄆州長慶戶三萬八千五百一十

皇朝戶主一萬四千一百九十一客二千八百四

十三孤老女戶六千二百一十七

風俗 同鄆州

人物

冉耕 鄆人 龔遂 字少卿金鄉人漢宣帝詔為渤海

宜行事到郡罷捕吏賊聞風而散 勸民賣劍買牛賣刀買犢郡大治 范式 字巨卿

與汝陽張劭善臨別謂劭曰二年後當過拜尊人

乃訂期至期劭白母殺雞炊黍候之果至後夢劭

呼曰巨卿吾以某日葬子能相及否式奔赴之喪

已發柩不肯前母曰元伯豈有望耶式素車白馬

號泣而來因執紼引柩乃前何休字劭公任城

式留止豕旁封植周固始去政事蕃敗鄭均

世儒罕有及者太傅陳蕃辟參政事七年

坐錮乃作公羊墨守不窺門者十七年

字仲虞任城人兄為吏受金均性潔酷諫後感動

俱著廉名肅宗時累辟不就上東巡幸其舍敕賜

尚書食祿終身江淹字文通濟陽人六歲能屬

色筆由是文藻日新後夢有人稱郭璞索筆還遂

無美句時人謂之才盡天監中為金紫光祿大夫

卒仲長統鉅野人拜尚書郎孫期濟陰人家

中養母郡舉方正賈羊酒郗鑒金鄉人嘗面折

請期驅豕入艸莽不顧郗鑒王敦不軌舉義

兵討蘇峻有社魏舒任城人少育外家甯氏方

稷功進太尉起宅術者謂此宅當出賢

魏舒起宅術者謂此宅當出賢

魏舒起宅術者謂此宅當出賢

魏舒起宅術者謂此宅當出賢

魏舒起宅術者謂此宅當出賢

甥舒蓋甯氏甥也嘗赴鍾毓辟善射發無不中毓嘆曰吾之不足以盡卿才如此射矣後拜司徒

程昱 東阿人少時夢上泰山捧日 王粲 鉅野人

邕異其才聞粲至倒屣迎之 郗愔 鑿子

土產

同鄆州 尤出荻蘆

鉅野縣 舊四鄉今五鄉 漢舊縣屬山陽郡後魏屬任城郡隋

于此置麟州尋廢縣屬戴州唐貞觀十七年戴州

廢屬鄆州周高祖于此置濟州 清涼洞在金鄉

山北深十餘丈內鑿石作有四小閣古老云秦始皇

皇帝避暑宮也 金山西征記金鄉山有穿石為

豕 獲麟堆春秋魯哀公十四年西狩獲麟注麟
仁獸聖王之嘉瑞也時無明王出而遇獲傳曰西
狩于大野叔孫氏之車子鉏商獲麟以爲不祥以
賜虞人 鉅野澤在縣東五里南北三百里東西
百餘里一名大野澤爾雅十藪魯有大野西狩獲
麟于此澤也 蚩尤墓在縣東北九里今山陽鉅
野縣有蚩尤肩髀冢昔黃帝殺蚩尤于涿鹿之野
身體異處故別葬焉冢高三丈四時民祭多赤氣
直貫衝天名曰蚩尤旗

鄆城縣

北五十里
元四鄉

左傳晉人執季文子于荅邱公還

待于鄆此卽其地漢魏皆爲壽張縣地後周置高平郡後併入廩丘縣隋開皇四年改爲萬安縣十六年于此置鄆州十八年改萬安爲鄆城縣貞觀八年移鄆州于須昌縣此復改爲鄆城縣屬不改黎邱在縣西四十五里黎侯寓于衛故黎臣諷衛侯詩曰胡爲乎泥中蓋惡其卑濕也 青陵臺郡國志云宋王納韓憑之妻使憑運土築青陵臺至今臺迹依然 單父城宓子賤爲宰之地 韓憑冢搜神記宋大夫韓憑娶妻美宋康王奪之憑怨王自殺妻陰腐其衣與王登臺自投臺下左右

攬之著手化爲蝶又云憑與妻各葬相望冢樹自然交柯有鴛鴦鳥棲其上交頸悲鳴

任城縣

東七十五里舊七鄉

古之任國太皞之後風姓也漢縣

屬東平國左氏謂任宿須句皆風姓也實司太皞與有濟之祀故也魏志文帝封鄆陵侯彰爲任城王高齊天保七年移高平郡于此任城屬焉隋開皇三年罷高平郡縣屬兗州 承匡山在縣東南七十里云女媧生處今山下有女媧廟 桓公溝源出縣理西四十里萌山下宋武北征記桓宣武以太和四年率眾平趙魏時遣冠軍將軍毛彪生

鑿此溝因號桓公溝于今四十九年矣溝已填塞
公遣朱超石更鑿通之 女媧陵在縣東南三十
九里 魏王粲墓在縣南五十二里 亢父城漢
爲縣廢城在今縣南五十里 邾婁城在縣南二
十里春秋哀公六年城邾瑕杜注任城亢父縣北
邾婁城也邾婁語訛

金鄉縣

東南八十五里
舊八鄉今七鄉

本漢東緡縣屬山陽郡卽古

緡國城陳留風俗傳東緡者古陽武戶牖鄉漢丞
相陳平卽此鄉人也後漢于今兗州任城縣西南
七十五里置金鄉縣蓋因穿山得金故名之屬山

陽郡唐武德四年于此置金州五年爲戴州貞觀

中廢戴州縣屬兗州

此用李吉甫郡縣志叙

桓元子河東

晉桓溫字元子領平北將軍徐兗二州刺史率弟
南中郎沖西中郎袁真步騎五萬北伐慕容暉于
鄴軍次金鄉時亢旱水道不通乃鑿鉅野三百餘
里以通舟運自清水入河暉將慕容垂傅末波等
率眾八萬拒溫戰于林渚溫擊破之遂至枋頭先
使袁真伐譙梁開石門以通運真討譙梁皆平之
而不能開石門軍糧竭盡溫焚舟步退自東燕出
倉垣經陳留鑿井而飲行七百餘里垂以八千騎

通之戰于襄邑溫軍敗績死者三萬人溫行役既久又疾疫死者十四五百姓怨咨溫名實頓減

昌邑故城漢爲縣高齊天保七年省廢城在今縣北四十二里又按郡國志云城內有鐵柱大五圍出地五六尺曾有人掘之及泉未見其本其城中城周十餘里外城周三十餘里漢景帝三年吳楚趙膠西濟南菑川膠東七國俱反天子命條侯周亞夫將三十六軍擊吳楚亞夫至淮陽問客鄧都尉策安出對曰莫若引兵東北壁昌邑以梁委吳將軍深溝高壘徑使兵絕淮泗口塞吳饋道吳梁

相做乃以全制其極破吳必矣條侯從之吳楚以
正月起三月皆敗卽此城也 司馬城在邑界郡
國志云城內有鐵碑云漢浮陽侯司馬耀所封邑

單州

單州今理單父縣本宋州之單父縣續漢書云單父侯國

也屬濟陽郡後魏置北濟陰郡隋開皇六年廢郡
遂置單父縣屬戴州唐貞觀十七年廢戴州縣入
宋州宋梁開平初于單父縣置輝州後唐同光二
年改輝州為單州

元領縣四

單父

宋州割到

碭山

同

成武

曹州割到

魚臺

兗州割到

州境

東西一百四十五里

南北八十五里

四至八到

西至東京三百五十里

西至西京七百七十里

西至長安一千六百八十里

東至徐州二百六十里

南至亳州二百七十里

西至曹州一百三十里

東南至宿州三百七十里

北至濟州一百四十五里

東北至兗州二百七十里

西南至宋州一百五十里

西北至濮州二百五十里

戶

唐開元戶入宋州

皇朝管戶主一萬九千四百四十三客四千三百三十九

風俗

同曹州

土產

碭山縣出枸杞

賦

紬絹

單父縣

元十鄉

古魯邑漢以為縣屬山陽郡即子賤為

宰身不下堂彈琴而理後漢以為侯國屬濟陰郡
後魏置北濟陰理單父城隋開皇六年廢郡又置
單父縣屬濟陰郡十六年于成武置戴州縣又屬
焉大業二年州廢縣屬曹州唐武德五年重置戴
州縣又屬焉貞觀十七年廢戴州改屬宋州今隸
單州 西防故城在縣北四十九里漢為防置兵
戍于此故城在今縣北猶存 宓子賤廟在縣東

南城外一里唐大中九年置 漢平城在縣東四十里高三丈漢書呂后單父人也今平城南六十里有呂后村 琴臺在縣北一里高三丈卽子賤彈琴之所 子賤碑在縣廳 巫馬期碑在縣西一百步聽訟臺上

碭山縣

東南九十里元十鄉

漢碭縣屬梁國後漢不改晉以其

地併入下邑宋復置碭縣屬梁郡後魏置曰安陽屬碭郡高齊文宣帝並廢以安陽縣屬彭城郡隋開皇十八年改安陽爲碭山大業二年改屬宋州碭文石也以其山出文石故以爲縣名梁升爲輝

州仍以爲赤縣又併入單父移理于此後唐同光二年復舊 故麻城漢爲麻鄉今故城在縣西北香城水經注云碭陂中香城在四水之中趙人有琴高者善鼓琴爲康王舍人行彭涓之術浮遊碭郡間二百餘年後在碭水中取龍子乘赤鯉魚出入也

成武縣 西北五十里舊漢舊縣屬山陽郡莽曰成安十五鄉今七鄉

續漢志曰成武屬濟陰郡隋屬戴州州廢屬曹州

今隸單州 梁邱山左傳齊侯宋公遇于梁邱杜

注宋地高平昌邑縣西南有梁邱 南北兩郤國

都城記文王庶子所封左傳取郟大鼎于宋戊申
納于太廟杜注成武東南有郟城宋邑也漢置郟
城縣于此以北有郟城故以此爲南郟實郟城縣
也唐樂朋龜墓在縣西二十里路南一百步

魚臺縣

東北九十里舊五鄉

漢方與縣漢書謂高祖取胡陵方

與是也屬山陽郡晉屬高平國高齊天保七年廢
隋開皇十六年復置唐寶應元年改爲魚臺縣以
城北有魯侯觀魚臺故以名縣元和四年八月淄
青李師道請移縣置于黃臺市從之至十四年正
月權隸徐州尋復隸兗州今隸單州湖陵故城

秦漢為縣今廢城在今縣東南一里湖陵蓋字偏
 傍誤耳 荷水即濟水一名五丈溝西自金鄉縣
 界流入去縣十里又東南流合泗水水經云濟水
 又東過方與縣北為荷水也 泗水東北自任城
 縣界流入經縣東與荷水合又東流入徐州沛縣
 界 觀魚臺在縣北十三里高一丈五尺周廻一
 里左傳云公將如棠觀魚臧僖伯諫曰凡物不足
 以講大事其材不足以備器用則君不舉焉君將
 納民於軌物者也不軌不物謂之亂政亂政亟行
 所以敗也公遂往陳魚而觀之僖伯稱疾不從書

曰公矢魚于棠非禮也注云今方與縣北有武唐亭魯侯觀魚臺

校勘

濮州

雷澤縣

本漢邲陽縣也古邲伯姬姓之國

按前漢書地理志濟陰郡成陽縣注有堯冢雷澤後漢志同又山陽郡有城都縣後漢省今雷夏澤堯陵皆在縣境則今記謂本漢成陽縣是矣又云古邲伯姬姓之國

似與諸書不合按左傳隱公五年杜注云
東平剛父縣西南有邾鄉又後漢志濟北
國有成縣本國劉昭卽引杜注爲證詳此
則成縣本屬濟北至晉時已併入東平之
剛父與前漢濟陰郡之成陽各異郡今記
旣以雷澤爲漢之成陽又以爲古邾國恐
誤又按前漢泰山郡後漢分爲濟北國並
有剛縣無剛父至晉爲東平國之剛平亦
無剛父未詳杜預同異之故

史記曰周武王封弟季戴于邾

按左傳云管蔡邠霍文之昭也邠固文王之
子所封然莫詳其名氏史記管蔡世家
但云封季載于冉又云季載後世無所見
今記引史記而言季戴封于邠蓋誤也未
知本何書爾

今縣北三十里邠都故城是也漢以爲縣屬
濟陰郡

按前漢山陽郡有城都縣非屬濟陰書爲
城非邠也後漢無此縣今記旣誤以邠國
爲成陽又以城都爲邠國轉爲訛舛據縣

境有郈都故城似是漢之城都故縣而誤
書爲郈者然所序又引孔子行于郈之野
以爲證則直以爲郈矣又後漢濟北國和
帝分泰山郡所置領五城其一爲茌平本
屬東郡其四無文而成縣又不言始置則
皆泰山之舊矣據前漢泰山但有式縣無
成縣式縣又無注疑式是成字相近而誤
然諸本皆同未易臆勑皆當詳考

單州

今記闕郡名按九域志當作碭郡

太平寰宇記卷之十四終